

Ifsiyoh̄

¹ Yih̄ khat Paulus kī taraf se hai, jo Allāh kī marzī se Masīh̄ Īsā kā rasūl hai.

Main̄ Ifsus Shahr ke muqaddasīn ko likh rahā hūn, unheñ jo Masīh̄ Īsā meñ imāndār haiñ.

² K̄hudā hamārā Bāp aur K̄hudāwand Īsā Masīh̄ āp ko fazl aur salāmatī baḅshheñ.

Masīh̄ meñ Ruhānī Barkateñ

³ K̄hudā hamāre K̄hudāwand Īsā Masīh̄ ke Bāp kī hamd-o-sanā ho! Kyoñki Masīh̄ meñ us ne hameñ āsmān par har ruhānī barkat se nawāzā hai.

⁴ Duniyā kī taḅhlīq se peshtar hī us ne Masīh̄ meñ hameñ chun liyā tāki ham muqaddas aur beaib hālat meñ us ke sāmne zindagī guzāreñ.

Yih̄ kitnī azīm muhabbat thī!

⁵ Pahle hī se us ne faislā kar liyā ki wuh hameñ Masīh̄ meñ apne beṅe-beṅiyān banā legā. Yihī us kī marzī aur k̄hushī thī

⁶ tāki ham us ke jalālī fazl kī tamjīd kareñ, us muft nemat ke lie jo us ne hameñ apne pyāre Farzand meñ de dī.

⁷ Kyoñki us ne Masīh̄ ke k̄hūn se hamārā fidyā de kar hameñ āzād aur hamāre gunāhoñ ko muāf kar diyā hai. Allāh kā yih̄ fazl kitnā wasī hai

⁸ jo us ne kasrat se hameñ atā kiyā hai.

Apnī pūrī hikmat aur dānāī kā izhār karke

⁹ Allāh ne ham par apnī poshīdā marzī zāhir kar dī, yānī wuh mansūbā jo use pasand thā aur jo us ne Masīh meñ pahle se banā rakhā thā.

¹⁰ Mansūbā yih hai ki jab muqarrarā waqt āegā to Allāh Masīh meñ tamām kāynāt ko jamā kar degā. Us waqt sab kuchh mil kar Masīh ke taht ho jāegā, ḳhāh wuh āsmān par ho yā zamīn par.

¹¹ Masīh meñ ham āsmānī bādshāhī ke wāris bhī ban gae haiñ. Allāh ne pahle se hameñ is ke lie muqarrar kiyā, kyoñki wuh sab kuchh yoñ saranjam detā hai ki us kī marzī kā irādā pūrā ho jāe.

¹² Aur wuh chāhtā hai ki ham us ke jalāl kī satāish kā bāis baneñ, ham jinhoñ ne pahle se Masīh par ummīd rakhī.

¹³ Āp bhī Masīh meñ haiñ, kyoñki āp sachchāī kā kalām aur apnī najāt kī ḳhushḳhabrī sun kar imān lāe. Aur Allāh ne āp par bhī Rūhul-quds kī muhr lagā dī jis kā wādā us ne kiyā thā.

¹⁴ Rūhul-quds hamārī mīrās kā bayānā hai. Wuh hameñ yih zamānat detā hai ki Allāh hamārā jo us kī milkiyat haiñ fidyā de kar hameñ pūrī maḳhlāsī tak pahuñchāegā. Kyoñki hamārī zindagī kā maqsad yih hai ki us ke jalāl kī satāish kī jāe.

Paulus kī Duā

¹⁵ Bhāiyo, main Ḳhudāwand Īsā par āp ke imān aur āp kī tamām muqaddasīn se muhabbat ke bāre meñ sun kar

¹⁶ āp ke lie Ḳhudā kā shukr karne se bāz nahīn ātā balkī āp ko apnī duāoñ meñ yād kartā rahtā hūñ.

17 Merī ḳhās duā yih hai ki hamāre Ḳhudāwand Īsā Masīh kā Ḳhudā aur jalālī Bāp āp ko dānāi aur mukāshafā kī rūh de tāki āp use behtar taur par jān sakeñ.

18 Wuh kare ki āp ke diloñ kī āñkheñ raushan ho jāeñ. Kyoñki phir hī āp jān leñge ki yih kaisī ummīd hai jis ke lie us ne āp ko bulāyā hai, ki yih jalālī mīrās kaisī daulat hai jo muḳaddasīn ko hāsīl hai,

19 aur ki ham īmān rakhne wāloñ par us kī qudrat kā izhār kitnā zabardast hai. Yih wuhī behad qudrat hai

20 jis se us ne Masīh ko murdoñ meñ se zindā karke āsmān par apne dahne hāth biḥāyā.

21 Wahāñ Masīh har hukmrān, ikhtiyār, quwwat, hukūmat, hāñ har nām se kahīñ sarfarāz hai, ḳhāh is duniyā meñ ho yā āne wālī duniyā meñ.

22 Allāh ne sab kuchh us ke pānwoñ ke nīche karke use sab kā sar banā diyā. Yih us ne apnī jamāt kī ḳhātir kiyā

23 jo Masīh kā badan hai aur jise Masīh se pūrī māmūrī hāsīl hotī hai yānī us se jo har tarah se sab kuchh māmūr kar detā hai.

2

Maut se Zindagī Tak

1 Āp bhī apnī ḳhatāoñ aur gunāhoñ kī wajah se ruhānī taur par murdā the.

2 Kyoñki pahle āp in meñ phañse hue is duniyā ke taur-tarīqoñ ke mutābiq zindagī guzārte the. Āp hawā kī kuwwatoñ ke sardār ke tābe the, us

rūh ke jo is waqt un meñ sargarm-e-amal hai jo Allāh ke nāfarmān haiñ.

³ Pahle to ham bhī sab un meñ zindagī guzārte the. Ham bhī apnī purānī fitrat kī shahwateñ, marzī aur soch pūrī karne kī koshish karte rahe. Dūsroñ kī tarah ham par bhī fitrī taur par Allāh kā ḡhazab nāzil honā thā.

⁴ Lekin Allāh kā rahm itnā wasī hai aur wuh itnī shiddat se ham se muhabbat rakhtā hai

⁵ ki agarche ham apne gunāhoñ meñ murdā the to bhī us ne hameñ Masīh ke sāth zindā kar diyā. Hāñ, āp ko Allāh ke fazl hī se najāt milī hai.

⁶ Jab ham Masīh Īsā par īmān lāe to us ne hameñ Masīh ke sāth zindā karke āsmān par biṭhā diyā.

⁷ Īsā Masīh meñ ham par mehrbānī karne se Allāh āne wāle zamānoñ meñ apne fazl kī lā-mahdūd daulat dikhānā chāhtā thā.

⁸ Kyoñki yih us kā fazl hī hai ki āp ko īmān lāne par najāt milī hai. Yih āp kī taraf se nahīn hai balki Allāh kī baḡhshish hai.

⁹ Aur yih najāt hameñ apne kisī kām ke natīje meñ nahīn milī, is lie koī apne āp par faḡhr nahīn kar saktā.

¹⁰ Hāñ, ham usī kī maḡhlūḡ haiñ jinheñ us ne Masīh meñ nek kām karne ke lie ḡhalaḡ kiyā hai. Aur yih kām us ne pahle se hamāre lie taiyār kar rakhe haiñ, kyoñki wuh chāhtā hai ki ham unheñ saranjām dete hue zindagī guzāreñ.

Masīh meñ Ek

¹¹ Yih bāt zahan meñ rakheñ ki māzī meñ āp kyā the. Yahūdī sirf apne lie lafz maḡhtūn istemāl karte the agarche wuh apnā ḡhatnā

sirf insānī hāthoñ se karwāte haiñ. Āp ko jo Ġhairyahūdī haiñ wuh nāmaḳhtūn qarār dete the.

¹² Us waqt āp Masīh ke baḡhair hī chalte the. Āp Isrāīl qaum ke shahrī na ban sake aur jo wāde Allāh ne ahdoñ ke zariye apnī qaum se kie the wuh āp ke lie nahīñ the. Is duniyā meñ āp kī koī ummīd nahīñ thī, āp Allāh ke baḡhair hī zindagī guzārte the.

¹³ Lekin ab āp Masīh meñ haiñ. Pahle āp dūr the, lekin ab āp ko Masīh ke ḳhūn ke wasīle se qarīb lāyā gayā hai.

¹⁴ Kyoñki Masīh hamārī sulah hai aur usī ne Yahūdiyoñ aur Ġhairyahūdiyoñ ko milā kar ek qaum banā diyā hai. Apne jism ko qurbān karke us ne wuh dīwār girā dī jis ne unheñ alag karke ek dūsre ke dushman banā rakhā thā.

¹⁵ Us ne shariyat ko us ke ahkām aur zawābit samet mansūḳh kar diyā tāki donoñ gurohoñ ko milā kar ek nayā insān ḳhalaq kare, aisā insān jo us meñ ek ho aur sulah-salāmatī ke sāth zindagī guzāre.

¹⁶ Apnī salibī maut se us ne donoñ gurohoñ ko ek badan meñ milā kar un kī Allāh ke sāth sulah karāī. Hāñ, us ne apne āp meñ yih dushmanī ḳhatm kar dī.

¹⁷ Us ne ā kar donoñ gurohoñ ko sulah-salāmatī kī ḳhushḳhabrī sunāī, āp Ġhairyahūdiyoñ ko jo Allāh se dūr the aur āp Yahūdiyoñ ko bhī jo us ke qarīb the.

¹⁸ Ab ham donoñ Masīh ke zariye ek hī Rūh meñ Bāp ke huzūr ā sakte haiñ.

¹⁹ Natīje meñ ab āp pardesī aur ajnabī nahīñ

rahe balki muqaddasīn ke hamwatan aur Allāh ke gharāne ke haiñ.

²⁰ Āp ko rasūloñ aur nabiyon kī buniyād par tāmīr kiyā gayā hai jis ke kone kā buniyādī patthar Masīh Īsā ḳhud hai.

²¹ Us meñ pūrī imārat juṛ jātī aur baḥtī baḥtī Ḳhudāwand meñ Allāh kā muqaddas ghar ban jātī hai.

²² Dūsron ke sāth sāth us meñ āp kī bhī tāmīr ho rahī hai tāki āp Rūh meñ Allāh kī sukūnatgāh ban jāeñ.

3

Paulus kī Ghairyahūdiyon meñ Ḳhidmat

¹ Is wajah se main Paulus jo āp Ghairyahūdiyon kī ḳhātir Masīh Īsā kā qaidī hūñ Allāh se duā kartā hūñ.

² Āp ne to sun liyā hai ki mujhe āp meñ Allāh ke fazl kā intazām chalāne * kī ḳhās zimmedārī dī gāī hai.

³ Jis tarah main ne pahle hī muḳhtasar taur par likhā hai, Allāh ne ḳhud mujh par yih rāz zāhir kar diyā.

⁴ Jab āp wuh paṛheñge jo main ne likhā to āp jān leñge ki mujhe Masīh ke rāz ke bāre meñ kyā kyā samajh āī hai.

⁵ Guzare zamānoñ meñ Allāh ne yih bāt zāhir nahīn kī, lekin ab us ne ise Rūhul-quds ke zariye apne muqaddas rasūloñ aur nabiyon par zāhir kar diyā.

* **3:2** Yānī ḳhushḳhabrī sunāne.

⁶ Aur Allāh kā rāz yih hai ki us kī ḳhushḳhabrī ke zariye Ġhairyahūdī Isrāīl ke sāth āsmānī bādshāhī ke wāris, ek hī badan ke āzā aur usī wāde meñ sharīk haiñ jo Allāh ne Masīh Īsā meñ kiyā hai.

⁷ Maiñ Allāh ke muft fazl aur us kī qudrat ke izhār se ḳhushḳhabrī kā ḳhādim ban gayā.

⁸ Agar che maiñ Allāh ke tamām muḳaddasīn se kamtar hūñ to bhī us ne mujhe yih fazl baḳhshā ki maiñ Ġhairyahūdiyon ko us lā-mahdūd daulat kī ḳhushḳhabrī sunāūñ jo Masīh meñ dastyāb hai.

⁹ Yihī merī zimmedārī ban gaī ki maiñ sab par us rāz kā intazām zāhir karūñ jo guzare zamānoñ meñ sab chīzoñ ke Ḳhāliq Ḳhudā meñ poshīdā rahā.

¹⁰ Kyoñki Allāh chāhtā thā ki ab Masīh kī jamāt hī āsmānī hukmrānoñ aur kuwwatoñ ko Allāh kī wasī hikmat ke bāre meñ ilm pahuñchāe.

¹¹ Yihī us kā azlī mansūbā thā jo us ne hamāre Ḳhudāwand Masīh Īsā ke wasīle se takmīl tak pahuñchāyā.

¹² Us meñ aur us par īmān rakh kar ham pūrī āzādī aur etamād ke sāth Allāh ke huzūr ā sakte haiñ.

¹³ Is lie merī āp se guzārish hai ki āp merī musībateñ dekh kar bedil na ho jāeñ. Yih maiñ āp kī ḳhātir bardāsht kar rahā hūñ, aur yih āp kī izzat kā bāis haiñ.

Masīh kī Muhabbat

¹⁴ Is wajah se maiñ Bāp ke huzūr apne ghuṭne ṭektā hūñ,

¹⁵ us Bāp ke sāmne jis se āsmān-o-zamīn kā har k̄hāndān nāmzad hai.

¹⁶ Merī duā hai ki wuh apne jalāl kī daulat ke muwāfiq yih baḡhshe ki āp us ke Rūh ke wasile se bātinī taur par zabardast taqwiyaṭ pāeñ,

¹⁷ ki Masīh īmān ke zariye āp ke diloñ meñ sukūnat kare. Hāñ, merī duā hai ki āp muhabbat meñ jaḡ pakareñ aur is buniyād par zindagī yoñ guzāreñ

¹⁸ ki āp bāqī tamām muḡaddasīn ke sāth yih samajhne ke qābil ban jāeñ ki Masīh kī muhabbat kitnī chauḡī, kitnī lambī, kitnī ūnchī aur kitnī gahrī hai.

¹⁹ K̄hudā kare ki āp Masīh kī yih muhabbat jān leñ jo har ilm se kahīñ afzal hai aur yoñ Allāh kī pūrī māmūrī se bhar jāeñ.

²⁰ Allāh kī tamjīd ho jo apnī us qudrat ke muwāfiq jo ham meñ kām kar rahī hai aisā zabardast kām kar saktā hai jo hamārī har soch aur duā se kahīñ bāhar hai.

²¹ Hāñ, Masīh Īsā aur us kī jamāt meñ Allāh kī tamjīd pusht-dar-pusht aur azal se abad tak hotī rahe. Āmīn.

4

Badan kī Yagāngat

¹ Chunāñche main jo K̄hudāwand meñ qaidī hūñ āp ko tākīd kartā hūñ ki us zindagī ke mutābiq chaleñ jis ke lie K̄hudā ne āp ko bulāyā hai.

² Har waqt halīm aur narmdil raheñ, sabar se kām leñ aur ek dūsre se muhabbat rakh kar use bardāsht kareñ.

³ Sulah-salāmatī ke bandhan meñ rah kar Rūh kī yagāngat qāym rakhne kī pūrī koshish karen.

⁴ Ek hī badan aur ek hī Rūh hai. Yoñ āp ko bhī ek hī ummīd ke lie bulāyā gayā.

⁵ Ek Ḳhudāwand, ek imān, ek baptismā hai.

⁶ Ek Ḳhudā hai, jo sab kā wāhid Bāp hai. Wuh sab kā mālik hai, sab ke zariye kām kartā hai aur sab meñ maujūd hai.

⁷ Ab ham sab ko Allāh kā fazl baḳhshā gayā. Lekin Masīh har ek ko muḳhtalif paimāne se yih fazl atā kartā hai.

⁸ Is lie kalām-e-muḳaddas farmātā hai, “Us ne bulandī par chaḥ kar qaidiyōñ kā hujūm giriftār kar liyā aur ādmiyōñ ko tohfe die.”

⁹ Ab ḡhaur karen ki chaḥne kā zikr kiyā gayā hai. Is kā matlab hai ki pahle wuh zamīn kī gahrāiyōñ meñ utrā.

¹⁰ Jo utrā wuh wuhī hai jo tamām āsmānoñ se ūnchā chaḥ gayā tāki tamām kāynāt ko apne āp se māmūr kare.

¹¹ Usī ne apnī jamāt ko tarah tarah ke ḳhādimoñ se nawāzā. Bāz rasūl, bāz nabī, bāz mubashshir, bāz charwāhe aur bāz ustād haiñ.

¹² In kā maqsad yih hai ki muḳaddasīn ko ḳhidmat karne ke lie taiyār kiyā jāe aur yoñ Masīh ke badan kī tāmīr-o-taraqqī ho jāe.

¹³ Is tariqe se ham sab imān aur Allāh ke Farzand kī pahchān meñ ek ho kar bālīgh ho jāenge, aur ham mil kar Masīh kī māmūrī aur balūghat ko mun'akis karenge.

¹⁴ Phir ham bachche nahīn raheñge, aur tālīm ke har ek jhoñke se uchhalte phirte nahīn raheñge jab log apnī chālākī aur dhokebāzī se

hamen apne jālon meñ phānsāne kī koshish kareñge.

15 Is ke bajāe ham muhabbat kī rūh meñ sachchī bāt karke har lihāz se Masīh kī taraf baṛhte jāenge jo hamārā sar hai.

16 Wuhī nason ke zariye pūre badan ke muḁhtalif hisson ko ek dūsre ke sāth joṛ kar muttahid kar detā hai. Har hissā apnī tāqat ke muwāfiq kām kartā hai, aur yon pūrā badan muhabbat kī rūh meñ baṛhtā aur apnī tāmīr kartā rahtā hai.

Masīh meñ Nāi Zindagī

17 Pas main Khudāwand ke nām meñ āp ko āgāh kartā hūn ki ab se ḡhairīmāndāron kī tarah zindagī na guzāren jin kī soch bekār hai

18 aur jin kī samajh andhere kī girift meñ hai. Un kā us zindagī meñ koī hissā nahīn jo Allāh detā hai, kyonki wuh jāhil haiñ aur un ke dil saḁht ho gae haiñ.

19 Behis ho kar unhoñ ne apne āp ko aiyāshī ke hawāle kar diyā. Yon wuh na bujhne wālī pyās ke sāth har qism kī nāpāk harkateñ karte haiñ.

20 Lekin āp ne Masīh ko yon nahīn jānā.

21 Āp ne to us ke bāre meñ sun liyā hai, aur us meñ ho kar āp ko wuh sachchāi sikhāi gai jo Īsā meñ hai.

22 Chunānche apne purāne insān ko us ke purāne chāl-chalan samet utār denā, kyonki wuh apnī dhokebāz shahwaton se bigartā jā rahā hai.

23 Allāh ko āp kī soch kī tajdīd karne den

²⁴ aur nae insān ko pahan leñ jo yon banāyā gayā hai ki wuh haqīqī rāstbāzī aur quddūsiyat meñ Allāh ke mushābeh hai.

²⁵ Is lie har shaḵhs jhūṭ se bāz rah kar dūsron se sach bāt kare, kyonki ham sab ek hī badan ke āzā haiñ.

²⁶ Ġhusse meñ āte waqt gunāh mat karnā. Āp kā ġhussā sūraj ke ġhurūb hone tak ṭhandā ho jāe,

²⁷ warnā āp Iblīs ko apnī zindagī meñ kām karne kā mauqā deñge.

²⁸ Chor ab se chorī na kare balki ḵhūb mehnat-mashaqqat karke apne hāthon se achchhā kām kare. Hāñ, wuh itnā kamāe ki zarūratmandon ko bhī kuchh de sake.

²⁹ Koī bhī burī bāt āp ke munh se na nikle balki sirf aisī bāteñ jo dūsron kī zarūriyat ke mutābiq un kī tāmīr karen. Yon sunane wālon ko barkat milegī.

³⁰ Allāh ke muqaddas Rūh ko dukh na pahuñchānā, kyonki usī se Allāh ne āp par muhr lagā kar yih zamānat de dī hai ki āp usī ke haiñ aur najāt ke din bach jāeñge.

³¹ Tamām tarah kī talkhī, taish, ġhusse, shor-sharābā, gālī-galoch balki har qism ke bure rawaiye se bāz aeñ.

³² Ek dūsre par mehrbān aur rahmdil hon aur ek dūsre ko yon muāf karen jis tarah Allāh ne āp ko bhī Masīh meñ muāf kar diyā hai.

5

Raushnī meñ Zindagī Guzārnā

¹ Chũnki āp Allāh ke pyāre bachche haiñ is lie us ke namūne par chalen.

² Muhabbat kī rūh meñ zindagī yoñ guzāreñ jaise Masīh ne guzārī. Kyoñki us ne ham se muhabbat rakh kar apne āp ko hamāre lie Allāh ke huzūr qurbān kar diyā aur yoñ aisī qurbānī ban gayā jis kī ḡhushbū Allāh ko pasand āī.

³ Āp ke darmiyān zinākārī, har tarah kī nāpākī yā lālach kā zikr tak na ho, kyoñki yih Allāh ke muqaddasīn ke lie munāsib nahīñ hai.

⁴ Isī tarah sharmnāk, ahmaqānā yā gandī bāteñ bhī ṡhīk nahīñ. In kī jagah shukrguzārī honī chāhie.

⁵ Kyoñki yaqīn jāneñ ki zinākār, nāpāk yā lālchī Masīh aur Allāh kī bādshāhī meñ mīrās nahīñ pāenge. (Lālch to ek qism kī butparastī hai.)

⁶ Koī āp ko bemānī alfāz se dhokā na de. Aisī hī bātoñ kī wajah se Allāh kā ḡhazab un par jo nāfarmān haiñ nāzil hotā hai.

⁷ Chunāñche un meñ sharīk na ho jāeñ jo yih karte haiñ.

⁸ Kyoñki pahle āp tārīkī the, lekin ab āp Ḳhudāwand meñ raushnī haiñ. Raushnī ke farzand kī tarah zindagī guzāreñ,

⁹ kyoñki raushnī kā phal har tarah kī bhalāī, rāstbāzī aur sachchāī hai.

¹⁰ Aur mālūm karte raheñ ki Ḳhudāwand ko kyā kuchh pasand hai.

¹¹ Tārīkī ke bephal kāmoñ meñ hissā na leñ balki unheñ raushnī meñ lāeñ.

¹² Kyoñki jo kuchh yih log poshīdagī meñ karte haiñ us kā zikr karnā bhī sharm kī bāt hai.

13 Lekin sab kuchh beniqāb ho jātā hai jab use raushnī meñ lāyā jātā hai.

14 Kyoñki jo raushnī meñ lāyā jātā hai wuh raushan ho jātā hai. Is lie kahā jātā hai,

“Ai sone wāle, jāg uṭh.

Murdoñ meñ se jī uṭh,

to Masīh tujh par chamkegā.”

15 Chunāñche baṛī ehtiyāt se is par dhyān deñ ki āp zindagī kis tarah guzārte haiñ—besamajh yā samajhdār logoñ kī tarah.

16 Har mauqe se pūrā fāyda uṭhāeñ, kyoñki din bure haiñ.

17 Is lie ahmaq na baneñ balki Ḳhudāwand kī marzī ko samjheñ.

18 Sharāb meñ matwāle na ho jāeñ, kyoñki is kā anjām aiyāshī hai. Is ke bajāe Rūhul-quds se māmūr hote jāeñ.

19 Zabūroñ, hamd-o-sanā aur ruhānī gītoñ se ek dūsre kī hauslā-afzāi kareñ. Apne diloñ meñ Ḳhudāwand ke lie gīt gāeñ aur naḡhmāsarāi kareñ.

20 Hāñ, har waqt hamāre Ḳhudāwand Īsā Masīh ke nām meñ har chīz ke lie shukr kareñ.

Miyāñ-Bīwī kā Tālluq

21 Masīh ke khauf meñ ek dūsre ke tābe raheñ.

22 Bīwiyo, jis tarah āp Ḳhudāwand ke tābe haiñ usī tarah apne shauhar ke tābe bhī raheñ.

23 Kyoñki shauhar waise hī apnī bīwī kā sar hai jaise Masīh apnī jamāt kā. Hāñ, jamāt Masīh kā badan hai jise us ne najāt dī hai.

24 Ab jis tarah jamāt Masīh ke tābe hai usī tarah bīwiyañ bhī apne shauharoñ ke tābe raheñ.

²⁵ Shauharo, apnī bīwiyōñ se muhabbat rakheñ, bilkul usī tarah jis tarah Masīh ne apnī jamāt se muhabbat rakh kar apne āp ko us ke lie qurbān kiyā

²⁶ tāki use Allāh ke lie maḵsūs-o-muqaddas kare. Us ne use kalām-e-pāk se dho kar pāk-sāf kar diyā

²⁷ tāki apne āp ko ek aisī jamāt pesh kare jo jalālī, muqaddas aur be'ilzām ho, jis meñ na koī dāgh ho, na koī jhurri, na kisī aur qism kā nuqs.

²⁸ Shauharoñ kā farz hai ki wuh apnī bīwiyōñ se aisī hī muhabbat rakheñ. Hāñ, wuh un se waisī muhabbat rakheñ jaisī apne jism se rakhte haiñ. Kyoñki jo apnī bīwī se muhabbat rakhtā hai wuh apne āp se hī muhabbat rakhtā hai.

²⁹ Āḵhir koī bhī apne jism se nafrat nahīñ kartā balki use ḵhurāk muhaiyā kartā aur pāltā hai. Masīh bhī apnī jamāt ke lie yihī kuchh kartā hai.

³⁰ Kyoñki ham us ke badan ke āzā haiñ.

³¹ Kalām-e-muqaddas meñ bhī likhā hai, “Is lie mard apne māñ-bāp ko chhoṛ kar apnī bīwī ke sāth paiwast ho jātā hai. Wuh donoñ ek ho jāte haiñ.”

³² Yih rāz bahut gahrā hai. Maiñ to us kā itlāq Masīh aur us kī jamāt par kartā hūñ.

³³ Lekin is kā itlāq āp par bhī hai. Har shauhar apnī bīwī se is tarah muhabbat rakhe jis tarah wuh apne āp se rakhtā hai. Aur har bīwī apne shauhar kī izzat kare.

6

Bachchoñ aur Wālidain kā Tālluq

¹ Bachcho, Ḳhudāwand meñ apne mān-bāp ke tābe raheñ, kyonki yihī rāstbāzī kā taqāzā hai.

² Kalām-e-muqaddas meñ likhā hai, “Apne bāp aur apnī mān kī izzat karnā.” Yih pahlā hukm hai jis ke sāth ek wādā bhī kiyā gayā hai,

³ “Phir tū ḳhushhāl aur zamīn par der tak jītā rahegā.”

⁴ Ai wālido, apne bachchoñ se aisā sulūk mat kareñ ki wuh ḡhusse ho jāeñ balki unheñ Ḳhudāwand kī taraf se tarbiyat aur hidāyat de kar pāleñ.

Ḡhulām aur Mālik

⁵ Ḡhulāmo, ḍarte aur kāñpte hue apne insānī mālikoñ ke tābe raheñ. Ḳhulūsdilī se un kī ḳhidmat yoñ kareñ jaise Masīh kī.

⁶ Na sirf un ke sāmne hī aur unheñ ḳhush rakhne ke lie ḳhidmat kareñ balki Masīh ke ḡhulāmoñ kī hāsiyat se jo pūrī lagan se Allāh kī marzī pūrī karnā chāhte haiñ.

⁷ Ḳhushī se ḳhidmat kareñ, is tarah jaisā ki āp na sirf insānoñ kī balki Ḳhudāwand kī ḳhidmat kar rahe hoñ.

⁸ Āp to jānte haiñ ki jo bhī achchhā kām ham ne kiyā us kā ajr Ḳhudāwand degā, ḳhāh ham ḡhulām hoñ yā āzād.

⁹ Aur māliko, āp bhī apne ḡhulāmoñ se aisā hī sulūk kareñ. Unheñ dhamkiyān na deñ. Āp ko to mālūm hai ki āsmān par āp kā bhī mālik hai aur ki wuh jānibdār nahīn hotā.

Ruhānī Zirābaktar

¹⁰ Ek āḳhirī bāt, Ḳhudāwand aur us kī zabardast quwwat meñ tāqatwar ban jāeñ.

¹¹ Allāh kā pūrā zirābaktar pahan leñ tāki Iblīs kī chāloñ kā sāmñā kar sakeñ.

¹² Kyoñki hamārī jang insān ke sāth nahīn hai balki hukmrānoñ aur iḳhtiyār wāloñ ke sāth, is tārīk duniyā ke hākimoñ ke sāth aur āsmānī duniyā kī shaitānī kuwwatoñ ke sāth hai.

¹³ Chunāñche Allāh kā pūrā zirābaktar pahan leñ tāki āp musibat ke dīn Iblīs ke hamloñ kā sāmñā kar sakeñ balki sab kuchh saranjām dene ke bād qāym rah sakeñ.

¹⁴ Ab yoñ khare ho jāeñ ki āp kī kamr meñ sachchāī kā paṭkā bandhā huā ho, āp ke sīne par rāstbāzī kā sīnāband lagā ho

¹⁵ aur āp ke pānwoñ meñ aise jūte hoñ jo sulah-salāmatī kī ḳhushḳhabrī sunāne ke lie taiyār raheñ.

¹⁶ Is ke alāwā imān kī ḳhāl bhī uṭhāe rakheñ, kyoñki is se āp Iblīs ke jālte hue tīr bujhā sakte haiñ.

¹⁷ Apne sar par najāt kā ḳhod pahan kar hāth meñ Rūh kī talwār jo Allāh kā kalām hai thāme rakheñ.

¹⁸ Aur har mauqe par Rūh meñ har tarah kī duā aur minnat karte raheñ. Jāgte aur sābitqadmī se tamām muqaddasīn ke lie duā karte raheñ.

¹⁹ Mere lie bhī duā kareñ ki jab bhī main apnā muñh kholūñ Allāh mujhe aise alfāz atā kare ki pūrī dilerī se us kī ḳhushḳhabrī kā rāz sunā sakūñ.

²⁰ Kyoñki main isī paighām kī ḳhātir qaidī, hān zanjīroñ meñ jakarā huā Masīh kā elchī hūñ. Duā kareñ ki main Masīh meñ utnī dilerī se yih paighām sunāūñ jitnā mujhe karnā chāhie.

Ākhirī Salām

²¹ Āp mere hāl aur kām ke bāre meñ bhī jānanā chāheñge. Ẁhudāwand meñ hamārā azīz bhāī aur wafādār Ẁhādīm TuẀhikus āp ko yih sab kuchh batā degā.

²² Maiñ ne use isī lie āp ke pās bhej diyā ki āp ko hamāre hāl kā patā chale aur āp ko tasallī mile.

²³ Ẁhudā Bāp aur Ẁhudāwand Īsā Masīh āp bhāiyōñ ko salāmatī aur imān ke sāth muhabbat atā karen.

²⁴ Allāh kā fazl un sab ke sāth ho jo an-miṭ muhabbat ke sāth hamāre Ẁhudāwand Īsā Masīh ko pyār karte haiñ.

Kitab-i Muqaddas
The Holy Bible in Urdu, Urdu Geo Version, Roman
Script

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-09-20

PDF generated using Haiola and XeLaTeX on 15 May 2025 from source files dated 15 May 2025

123ff8cb-27b3-5817-a02a-22e67145fd30